



竹雞仔行新路

「吉各乖！吉各乖！」毋知哪仔飛來个竹雞仔，七早八早就發出恁熟事个叫聲。頭擺在鄉下、山肚，不時聽著「吉各乖！吉各乖」抑係「吉吉仔過乖！吉吉仔過乖」个叫聲，從來就毋識試著有麼个奇怪？在這都市肚聽著，試著還難得，嘎恤起當多个懷念同往事。

竹雞仔當驚見笑、畏羞，一看著人遽遽就囥入草窠、樹叢落去。圓身無幾大，大約半尺零長定定，腳細細、瘦瘦，長透一家人歸群仔共下生活。朝晨一天光抑係臨暗仔，佢就「吉各乖！吉各乖」大聲喊起來，像當急樣仔，在這山頭開始，像潑水樣仔，一下仔潑到遠遠該片去。一時間歸隻山間，一聲又一聲，哪仔就聽著「吉各乖！吉各乖！」个亮聲回應起來，這起該落，該各這乖。故所客話講人腳囊肚細細、瘦瘦走當遽，安到「竹雞仔腳」；講人當急性，就講佢「竹雞仔形」。

細細時在山肚，生活苦到屙痢肚，無麼个好料好食，自家畜个蹶山雞愛留來賣，賣著錢好添所費；生个雞卵愛留來孵，孵出雞子畜大好賣。故所靠山食山，竹雞也係雞，就去捉來食。愛仰仔捉竹雞仔呢？盡重要就愛知厥性。竹雞仔有地盤性、好鬥，麼人係占著厥地盤，佢就會出來逐。這下人有錄音機，錄好竹雞仔聲，拿去山肚一放，張好「落仔」睇等，竹雞仔話著有別儕來占厥地盤，走出來就分人捉著也。頭擺無錄音機，又愛仰仔捉呢？佢還有一隻特性，就係「愛行新路」，故所佬兜就在山野樹叢邊，長透有竹雞仔出現个所在，開一條新路分佢行，用麻線做一隻「落仔」，放到新路項。成點鐘仔去巡看啊！差毋多就會罽著一隻。開加兩條新路，一日罽也兩三隻，該日就有「雞肉」好食也！

故所愛捉竹雞仔，就愛「投其所好」，知佢「愛行新路」个性。這下恤起來，食恁得人惜个竹雞仔，實在也異粗殘，毋過在該央時，也係無奈何个事。社會項又乜係恁仔，想愛制服對方，就愛知厥性，摸厥弱點；想愛升官發達，就愛知長官个性，得著寵信；想愛交女朋友，就愛知厥性，代佢設想。故所當多人係笑面虎，肚裡行事，恁係毋精，像「竹雞仔行新路」，分人摸透透，該就慘咧！

反倒轉來想，一隻社會定著愛創新，「墨守成規」毋會進步。試著「竹雞仔行新路」，乜有創新个觀念，恁乜愛有「竹雞仔行新路」創新个思維。「好新色」、「著新衫」逐儕都想，思維乜愛創新，毋好長透行舊路，試行新路看啊！逐擺駛車仔去寮，看著係有新路好行，就講：「恁來行新路看哪！」老姐就講：「你同竹雞仔共樣！」

作者：徐貴榮

☆詞彙學習☆

【嘎】sa：結果、就、竟然。

【該兩時】ge liong' sii'：那時候。

【仰仔】ngiong' e'：如何、怎麼？同「仰般」。

【落仔】lab' e'：套子、陷阱。

【睇等】pu den'：在暗中藏著窺伺。

【恁仔】an' e'：這樣。同「恁樣」。

【罽】tag'：綁。